

ALAHADY 2 Fiavian'ny TOMPO - TAONA A



"Mibebaha ianareo fa efa akaiky ny Fanjakan'ny lanitra."

Ry kristianina havana, mitohy ny diantsika mamakivaky ny vanim-potoana manokana lehibe hiomanantsika amin'ny fahatongavan'ny Tompo. Amin'izao Alahady faharoa ny Fiaviana izao, ny vakiteny dia mampitodika atsika amin'ny modely anankiray dia i Joany Batista.

Raha nisy tokoa ny olona niomana sy nampiomana ny fiavian'ny Tompo dia i Joany Batista, izy no mpaminany farany ary tsy misy ny mpaminany lehibe toa azy hoy i Jesoa.

Vakiteny I : Iz. 11, 1-10

Salamo : Sal. 71

Vakiteny II : Rôm, 15, 4-9

Evanjely : Mt. 3, 1-12

Ny mpaminany dia mandray ny sitrak'Andriamanitra sy manambara an'izany mba hivelomany mpiara-belona.

Hita taratra tamin'ny fiainan'i Joany Batista tokoa izany.

Amin'izao Alahady faharoa ny Fiaviana izao dia asain'ny Eglizy isika amin'ny alalan'ireo vakiteny telo mba hifantoka bebe kokoa amin'ny endrik'i Joany Batista ho modely amin'ny fiomanana sy fivelomantsika ny fiavian'ny Tompo mba ho

Noely hitondra fiadanana sy fihavaozana ary hahatonga ny finoana velona eo anivontsika. Efa voalazantsika matetika fa na samy sarotra aza dia moramora kokoa ny manorina ny Eglizy trano toy izay ny Eglizy olona satria isika tsirairay avy no tsy maintsy ho Eglizy tempolin'Andriamanitra. Ny Noely tsy hoe tonga ao an-deglizy ka mankalaza ny litorjia ihany fa ny Fontsika mandray ny Tompo no tena zava-dehibe ary indrindra ho vavolombelona tokoa isika, ho Kristianina tahaka ny nataon'i Joany Batista hitantsika ao amin'ny Evanjely (*Mt. 3, 1-12*) ka hiezaka isika sady hankalaza no hiaina bebe kokoa toa azy amin'ny fiainantsika andavanandro.

Aoka ary mba ho vonona isika hibe-baka fa efa akaiky ny Tompo araka ny tenin'i Joany Batista: nampahafatariny tsara ny maha zava-dehibe ny fibebahana satria raha tsy mibe-baka isika dia very ka hataon'Andriamanitra tahaka ny hazo rehetra izay tsy mamoa voa tsara ka hokapaina, ary hatsipy any anaty afo.

Ry Kristianina havana, izao vanim-potoana izao anie no aoka mba hampamokatra ny fontsika, ho finoana mamokatra ho an'ny manodidina atsika. Harena lehibe ny finoana, harena isika tsirairay avy ka aoka hamokatra tsara isika.

Fomba ahoana ary ny hamokarantsika ?

Aoka ho feno fitiavana ny fiainantsika ka mizara fitiavana eo amin'ny manodidina atsika

Aoka ho feno fanantenana isika araka ny fampianarana tamin'ny Alahady voalohany Fiavian'ny Tompo fa indrindra amin'izao andro sarotra diavintsika izao

Aoka hanapa-kevitra isika fa tsy hanao ampitso lava **mba hiroso** lalindalina kokoa **amin'ny fandalinam-pinoana**.

Aoka hibanjina bebe kokoa ny fiainan'i Joany Batista isika amin'ity herinandro vaovao ity.

Azo zaraina telo ny fomba noentiny nampamokatra ny fiainany :

- 1- niafy izy ary naneho tamin'ny tenany manontolo amin'ny fiovam-penitra mahery vaika satria nandray an'i Jesoa,
- 2- ny teny nataony izay nitarika ny olona,
- 3- ary indrindra tamin'ny alalan'ny fibebahana satria araka ny lazaintsika 'ny teny manaitra fa ny atao no mahasarika'

Raha tiantsika hamokatra am-pinoana tokoa ny fiainantsika dia izao fotoana izao no aoka hanararaotantsika fa anio no tena maha Kristianina atsika. Tsy hoe hirehareha isika sanatria izany fa anatin'ny fanetrentena izay anisan'ny toetra nampiavaka an'i Joany Batista. Na dia nanana fahalalana miteny sy mampita hafatra aza izy amin'ny maha mampinany azy dia nanao izany rehetra izany tao anatin'ny fanetrentena.

Masindahy Paoly ao amin'ny vakiteny faharoa (Rôm, 15, 4-9) dia manamafy an'izany ka manasa atsika handalina bebe kokoa an'izany sy mananatra atsika hoe *"Koa mifandraisa ianareo, tahaka ny nandraisan'i Kristy anareo, mba ho voninahitr'Andriamanitra"*.

Manambara izany fa miova tokoa ny fiainantsika raha mahay mifandray isika tahaka ny nandraisan'i Kristy atsika dia izy nanolotra ny tenany ho antsika, izy nanasoa sy nanompo atsika.

Mibe-baka tokoa isika raha manompo sy manasoa ary mikarakara ny namana. Anisan'izany koa ny fandraisana ny tontolo iainana ho sarobidy ka hikorakorantsika azy fa indrindra moa efa anatin'ny fotoana fambolena hazo isika izao.

Anisan'ny fibebahana ny tsy hanapotehana ny tontolo iainana : halavirintsika ny doro tanety sy ny tevy ala, hiezaka isika hamboly hazo araka ny hafatra ataontsika eto amin'ny diosezy dia ny mamboly hazo enina isaky ny olona vita batemy mba ho diosezy maitso hitondra fanantenana ny diosezintsika.

Anisany manambara fibebahana koa ny fandraisana an-tànana ny fiainan'ny diosezintsika amin'ny alalan'ny hasim-pinoana.

Ireny rehetra ireny no hanehoantsika fa tena mihavao isika ka mihatsara sy mamelona ny finoantsika fa indrindra amin'izao taonany finoana izao.

Ry Jesoa Kristy Tompo zokinay ô, tonga eto aminay tokoa ianao ary tianao hihavao izahay, natolotrao ho modely ho anay i Joany Batista, enga anie ho tahaka azy tokoa ny fiainanay amin'izay hanorina sy hampiroborobo ny fanjakanao eto anivonay izay fanjakana feno fiadanana sy fifankatiavana ka hahomby amin'ny zavatra ataonay rehetra izahay. Hamokatra tokoa ny fiainanay, hamokatra finoana sy fitiavana ary fanantenana ka hahay hampitraotra ny finoana sy fiainana andavanandro izahay mianakavy eo anivon'ny manodidina anay. Amen

Mompera Arseveka Mgr Benjamin Ramaroson